



Cumpleina concentraziun dil Chor mischedau Vignogn durant la producziun da pag ella baselgia s. Rumetg.



Ewald Vinzens, il president dil District da cant Surselva, ei satisfatgs ed ha numnau la fiasta da cant a Falera ina fiasta da cant fenomenala.

«Jeu contel per mia veta bugen»

La 45avla Fiata da cant dil District da cant Surselva a Falera ei stada in success cumplein

DA SUSI ROTHMUND / ANR

■ **La fiasta da cant egl onn giubilar da 150 onns District da cant Surselva ei stada in eveniment unic che ha carmala a Falera la sonda 1050 cantaduras e cantadurs e silmeins aunc ina ga tons amitgs dil cant sursilvan. Per l'organisaziun zun gartegiada ei il comite d'organisaziun dil Chor viril-baselgia da Falera presidiaus da Giusep Giuanin Decurtins staus responsabels. Rodund 350 voluntaris ein s'engaschai cun plascher e premura ed han contribuuiu grondamein al success cumplein.** El center dalla fiasta da cant ein secapescha las producziuns da pag dils 32 chors cun 1050 cantaduras e cantadurs stadas. Ils compliments ed il plascher digl auditori ed oravontut ils predicats dalla giuria cul cau-expert *Armon Caviezel* alla testa han confirmau la buna qualitat dil cant sursilvan (mira tgastina). Sco *Ewald Vinzens*, il president dil District da cant Surselva, ha declarau la sonda silla gronda tribuna amiez il vitget da cant vali ei da festivar il giubileum da 150 onns District da cant Surselva ed era da seregurdar dils antenats che han fundau quella grondiusa ovra. Cun *Erwin Ardiuser* seigi ei reussiu d'anflar ina persuna competententa che hagi creau cun grond engaschi, stentusa lavur e bia fin sentiment la cronica giubilara «Schiditg che stattan cuolms e vals». Sco *Vinzens* ha puntuau ei il District da cant Surselva cun 46 chors e treis chors d'affons e giuvenils il pli grond district e vala sco perga da cant dil Grischun. In bi e variont matg da canzuns ei d'anflar sil discumpact cumpariu tier la cronica. «Tgei fussen nossas canzuns e nos chors senza il Radio Romontsch», ha *Vinzens* constatau ed aschuntau che la realisaziun dil discumpact seigi oravontut stada pusseivla grazia al grond engaschi da *Giusep Giuanin Decurtins* e da Radio e Televisiun Rumantscha (RTR).

Falera ha scret in niev capetel

«Igl ei stau ina grondiusa fiasta ed ins sa mo far compliments als organisaturs», ha *Vinzens* ludau e numnau la fiasta da cant a Falera ina «fenomenala» fiasta da cant. Cun quella fiasta vegni ei scret in niev ca-

petel per las proximas fiastas. Il fervent giavisch dil District da cant Surselva seigi numnadamein stau da far la fiasta pli semplia e sche pusseivel mo pli duront in di. «Tut quei ei reussiu ed ins astga mirar anavon cun curascha enviers las fiastas vegntas», ei il president dil District da cant Surselva satisfatgs. Alla fin ha el engraziu a tuts cumpigliai ch'ei s'engaschai pil beinreussir dalla fiasta, als organisaturs e buc il davos als chors e lur dirigents. Senza lur grond engaschi, tut las stentas e numerusas emprovas fussen talas fiasta buca pusseivlas. «Duess buca tut esser gartegiau ed ei il pareri dils experts in tec auter che spitgau, lu buca schei pender il tgau. Prendei a pèz lur explicaziuns e sespruei da metter entuorn lur cussegls egl avegnir», ha *Vinzens* cussegliu. Cuntents e satisfatgs ei cun raschun era il president dil comite d'organisaziun. Sco *Decurtins* ha declarau all'anr levien ei far in'otra fiasta da cant, ina fiasta populara nua che tuts, cantadurs e publicum, semischeidien el vitget da cant e quei seigi gartegiau. Il success seigi d'attribuir als chors e dirigents e secapescha alla gronda lavur dils voluntaris ed al grond sustegn dalla vischnaunca e da numerus sponsurs e buc il davos era all'aura favoreivla. Las zonas da silenzi ellas baselgias hagian buca giu plaz per tut quels che levien tedlar ils chors, mo ils organisaturs hagian viliu schar cantar en buns locals pils chors e La Fermata seigi buc ideala pil cant. Leu fussen pigns chors i a piarder e quei hagian ei viliu evitar. Sin www.rtr.ch anflan interessai numerusas contribuziuns dalla fiasta da cant.

«Bi sco adina»

Cumplements ha *Vinzens* era fatg al Chor d'affons vischnaunca Sumvitg culla dirigente *Flavia Walder-Hublard* ed al Chor d'affons Surselva cun *Rilana Cadruvi Scherrer* alla bitgetta: «Els ein nossa speranza pigl avegnir.» Ch'els dus chors d'affons che han concertau comunablamain el vitg dumbran ensemen varga 100 cantaduras e cantadurs ei la megliera cumprova ch'il cant sursilvan viva, inspirescha, fa plascher ed ha in futur empermettent. Enzacu suentermiezdi eran enzacuns giuvenils serimnai sin via sper

baselgia parochiala en rudi e fagevan emprovas da cant ch'ei era in bi mirar e tedlar. Sco ina dad ellas, *Tamara Deplazes* da Duin, ha tradiu all'anr era quei l'emprova per far ina sorpresa allas dirigentas dils chors d'affons. Ei vegnien ord scola e bandunien ils chors e culla canzun «Bi sco adina» lessien ei engraziu allas dirigentas. Quei han ei lu era fatg suenter il concert communabel e la sorpresa ei gartegiada: «Vus haveis mussau con bia ch'il cant vala, nus cantein 'bi sco adina' da *Mattiu Defuns*, pertgei cun vus eis ei adina bi», ha *Deplazes* declarau el num da tuts. Sco la matta da Duin ha declarau all'anr vegli ella era cantar vinavon en in chor sche quei mondi a prau cun siu emprendissadi: «Jeu contel per mia veta bugen.»

Emoziuns

La fiasta da cant ha svegliu bia emoziuns tier cantaduras e cantadurs, dirigentas e dirigents, mo era tier cumponists e poets. Aschia dess il poet *Arnold Spescha* alla fiasta da cant il predicat «excellent». El ha anflau laud per la gronda varietad da program e canzuns. Ei seigi vegniu cantau sin ault nivel e cun grond plascher. La preschientscha da 32 chors muossi ch'il cant sursilvan fureschi. «Igl ei in grond plascher d'udir agens texts e co il cumponist ha interpretau mes plaid. Igl ei muments special ed jeu hai l'impressiun che la musica detti als plaid ina dimensiun supplementara», ha *Spescha* declarau. Gudiu la fiasta ha era il cumponist *Gion Balzer Casanova* e sco el ha tradiu buc il davos per quei ch'ina massa chors hagian cantau da sias melodias. «La qualitat dil cant sursilvan ei buna», ha el puntuau ed aschuntau che nus hagian la cuida d'aver buna glieud che conti bugen. In impuls da cumponer seigi quella fiasta denton buca dispert, el drovi il dretg mument ed il basegns per cumponer ina melodia. Gudiu la fiasta ed ils numerus inscunters ha era il musicist e cumponist *Alwin Muoth* che ei staus a Falera per ina ga senza esser en uffeci sco dirigent ni expert. Aschia hagi el saviu guder aunc meglier il cant e cunzun l'interpretaziun dil dentercant ord sia messa festiva en Es «Plaid e Paun» dil Chor-baselgia S. Gions Mustér hagi levintau grondas emoziuns.



L'avertura dalla 45avla Fiasta da cant sursilvana cul til dallas bandieras dils chors participonts.



Giusep Giuanin Decurtins en discurs cun in da 350 voluntaris. Decurtins ha presidiau il comite d'organisaziun dil Chor viril-baselgia da Falera che ha organisau ina fiasta che duei esser muossavia pil futur.



Muments plein tensiun – il Chor viril Ligia Grischa durant il discurs d'expert.



Il Chor viril Ligia Grischa dumbra 67 cantadurs e vegn dirigius da Christoph Cajöri. Per lur presentaziun da pag han ils umens survegniu il predicat «excellent».



Il Chor d'affons vischnaunca Sumvitg: frestg, melodijs e plein plascher pil cant.